

La Pro Svizra Rumantscha cun in vast program

Ses radius d'acziun vegn adina schlargià dapli

■ (anr/gc) La Pro Svizra Rumantscha (PSR) è vegnida fundada 1992 per fullar via ad ina gasetta rumantscha dal di. Dapi che quella è realisada 1997 cun La Quotidiana extenda la PSR si'activitad cun far punts entaifer la Rumantschia ed anovers. Tar la 18. radunanza da la PSR – sonda passada a Cuira – èsi sa mussà ch'ella ha adempli bain l'incarica fixada e mess clers accents per cuntinuar sia lavur era quest onn. Sco quai ch'il parsura da la PSR, Arno Berther, ha constatà han ins pudì arranschar la stad passada in champ da teater per uffants a Tschlin. Tar uffants rumantschs si da la Bassa èn era insaquants dad els ord regiuns rumantschas vegnids vitiers – en tut 20. Sut l'egida dals pedagogs da teater, Annina Sedlacek e Roman Weishaupt, èn ils participants vegnids introducids en il far teater. Els hajan legrà a la fin ils lur cun ina bella e bainfrequentada represchentaziun. Quai champ saja stà in success cumplain.

LQ ed ANR collavureschan stretgamain

Era las midadas tar La Quotidiana (LQ) – e spezialmain ses fastidis per survivor – èn vegnids menziunads dal parsura en vista a la reduziun tar la redacziun da LQ. En quest connex saja vegnì vesaivel con impurtanta che l'Agentura da Novitads Rumantscha (ANR) cun sia prestaziun constanta e fidaivla saja per LQ. Mo che la ANR porschia per pli ditg ses servetschs be sch'ella survegnia dapli meds dal maun public. Per il mument possia



Il president da la PSR, Arno Berther, cun il program per il champ da quest onn en Lumnezia.

FOTO G. CAPAUL

la ANR cuvri il plicusts da redacziun tras reservas.

Vendi 650 da 1000 dal med «Allegra rumantsch»

2006 ha la PSR edì il med d'instrucziun «Allegra rumantsch» per magisters che vulan infurmar, spezialmain en la Bassa, davart il linguatg rumantsch e nossa cultura. Dals 1000 exemplars producids sajan prest 650 gia vendids. Ins è cuntent da quai esit che sa fetschia en stretga collavuraziun cun la chasa editura Klett e Balmer.

Quint cun pitschen deficit

IL quint annual da la PSR sera – tar entradas da ca. 10 300 ed expensas da 11 900 francs cun in deficit da 1600 francs. La facultad muntia anc a bun 45 000 francs. Las entradas derivan pli pli da las contribuziuns annualas da prest 400 commembers (giuvenils pajan 15, singuls 30, conjugals 50 e persunas giuridicas 120 francs). Las expensas principals pertutgan il champ da teater. Era per quest onn datti – tenor preventiv – in deficit. Per il champ 2010 quintan ins cun custs da ca. 30 000 francs, mo era da survegnir persunter sustegns considerabels da diversas varts.

Champ 2010 e viadi culturistoric

Era per 2010 è gia vegnida instradada la realisaziun dad in champ da teater – questa giada dentant a Cumbel en Lumnezia – per ca. 40 uffants e giuvenils ord tuttas regiuns rumantschas e si da la Bassa. Cun duas persunas dal fatg vegn creà in toc

teater cun represchentaziun a la fin. Era vegn offri in program accumpignant. Gia han ins pliras annunzias ord la Surselva, mo ins vegn a sa dar tutta fadia da vegnir natiers era cun uffants d'autras regiuns e si da la Bassa. L'entschatta d'october da quest onns preveda la PSR d'arranschar – cun auters partenaris – in viadi culturistoric da dus dis tras il Grischun – sut l'egida da persunas cumpetentas. Quai duai succeder en connex cun il giubileum «10 onns matura bilingua en il Grischun» e cun tals che l'han fatg. Era la Lia Rumantscha po sa participar.

Arno Berther – vinavant parsura

Arno Berther, Sedrun, è vegnì confermà sco parsura da la PSR per il proxim trienni – medemamain il consuprastant David Carigiet, Glion. En suprastanza entran da nov: Annalisa Schaniel, Cuira; Catarina Morscher, Val Flix/Sur, ed Urs Zingg, Küsnacht (ZH)/Puntraschigna. Els remplazzan ils demissionants: Werner Carigiet, Dardin; Duri Denoth, Scuol, e Reto Pedotti, Ftan, che han appartegnì biers onns a la suprastanza. Per lur servetschs è vegnì engrazià fitg e cun in regal. – Revisurs da quint restan: Francestg Cajacob, Mustér, e Carl Caflisch, Trin.